

史臣曰設堂陛而阻之嚴聲色而臨之為臣子而密邇于左右者鮮見君顏暹有見於此故特啓之可謂知言矣但以入侍經筵為廢事事豈大於論難經義輔導君德者乎自謂無識而敢陳無識之說於上前則甚矣其惑也何足責乎

特進官元繼儉曰李芑之事當初臺諫侍從啓其罪惡而既不快從只罷其職未久還叙臺諫既陳其不可則又為留難不勝悶鬱夫大臣或有容衆之量或有清簡之德然後可謂之大臣而芑則無一事可稱有衆惡備具又與李無疆同氣相求同惡相濟其誤國家莫此為甚大抵李無疆陳復昌俱以匹夫濁亂朝政非徒貽患於國家又將嫁禍於士林上之好善惡惡若不分明則老疾垂死者固不足畏也年少如芑者若繼而起則他日之禍有不可勝言者矣○益陽君懷率_{中宗庶弟也}停朝市三日乙巳兩司啓李芑事不允○日暈冠色內赤外青夜未方巽方如火氣

丙午兩司再啓李芑事不允○夜月暈兩珥色黃白